

PRIMERA EPÍSTOLA DEL APÓSTOL SAN PABLO A LOS TESALONICENSES

Salutación

1 Huēj huin Pablo. Ni arun anin' únj Silvano nga Timoteo yanj carta nan a'níj únj huaj rian án re' huin ín re' ni tsínj nico' Yan'anj man xuman' Tesalónica. Ni nicañ dugüi' a ni é re' nga Yan'anj huin chrej né' nga Señor Jesucristo. Ni huin ruhua anin' únj sisi guiyaj Yan'anj nga Señor Jesucristo sinduj rian án re' gahuin din'inj chruhua á re'.

Ejemplo de los tesalonicenses

²Niganj a'ui' anin' únj si guruhua Yan'anj xi'í daran' a ni é re'. Ni nanun ruhua únj xi'í a ni é re' ngaa achínj jni'yaj únj rian Yan'anj. ³Ni ya'yoj ngaa achínj jni'yaj anin' únj rian Yan'anj huin chrej né', ni nanun ruhua únj daj guiyaj sun sa' á re' si-sun Yan'anj xi'í si xuman ruhua á re' ni'yaj á re' Jesús. Ni xi'í si 'i ruhua á re' ni'yaj á re' Yan'anj, ni guiyaj sun sa' á re' si-sun Señor. Ni gunucuaj á re' rian ni sayun xi'í si ana'uij ni é re' sisi chraçuij yun'unj Señor Jesucristo a ni é re'. ⁴Ni 'i ruhua Yan'anj ni'ya a ni é re' huin ín re' jnánj né' nga xica'uij

né'. Ni ni'i anin' únj sisi hué Yan'anj nacui ni é re' sisi guinico' a ni é re' Yan'anj.

⁵Daj si ngaa ga'mi únj nuguan' sa' rian án re', ni sé urin nuguan' ga'mi únj gan'anj únj. Sanj ga'mi únj nga si-fuerza Espíritu Santo. Ni gahuin yya ruhua únj sisi nuguan' xanga' huin nuguan' ga'mi únj. Ni ni'i sa' ni é re' daj guiyaj únj ngaa guimán únj scanij a ni é re'. Daj si nano' únj sisi daj ga'ue gahuin sa' ruhua ni é re' aj. ⁶Ni gaxi'i a ni é re' guiyaj gue a ni é re' daj rún' guiyā nga daj rún' 'yaj gue Señor nej. Ni nunj si guiran' a ni é re' nico sayun guiyaj ni ngüi nun xuman ruhua ni'yaj Jesús, sanj 'ngo guinico' a ni é re' si-nuguan' Yan'anj. Ni gahuin niā' ruhua á re', guiyaj Espíritu Santo. ⁷Xi'í daj ni digyán ni é re' 'ngo ducuánj sa' rian ni ngüi xuman ruhua ni'yaj Yan'anj mán estado Macedonia nga estado Acaya.

⁸Ni gaxa'ni si-nuguan' Señor scanij ni ngüi mán estado Macedonia nga estado Acaya, guiyaj á re'. Sanj sé urin nungüej estado daj, sanj gaxa'ni nuguan' daj nin' gachra' chruhua xungüi, guiyaj á re'. Ni ni'i daran' ni sij

daj xuman ruhua á re' ni'yaj á re' Yan'anj. Xi'í daj ni nitaj chrej hua sisi ga'mi anin' únj rian ni ngüi daj xi'í si gui'yaj á re'. ⁹Ni a'mi man'an ni ngüi daj gahuin ngaa guchi' anin' únj rian man án re'. A'mi ni sij sisi ga'mi sa' á re' nga únj ngaa gane únj nga á re'. Ni a'mi ni sij sisi duna á re' yan'anj 'yaj ra'a ni sij. Ni gaxi'i ni é re' guinico' a ni é re' Yan'anj hua ni'na' huin Yan'anj xanga' aj. ¹⁰Ni hué daj a'mi ni sij sisi ana'uij a ni é re' sisi nanicaj Jesús ga'na' sij xata' huin sij da'nij Yan'anj anj. Ni ganánij sij scanij ni níman, gui'yaj Yan'anj. Ni Jesús huin si ganacaj né' ngaa gahuin nico castigo ni ngüi da'ui gaquin', gui'yaj Yan'anj.

Ministerio de Pablo en Tesalónica

2 Ni ni'i a ni é re' sisi ngaa guchi' anin' únj rian man a ni é re', ni sé si guchi' yun únj huin ún re' jnánj né' nga xica'uij né' mánj. ²Ni hua ni'i a ni é re' daj guiran' únj sayun xuman' Filipos ngaa ga'mi quij ni sij rian únj. Ni nunj si ducu gunun' ni ngüi man xánj án re' nga únj, sani chracuij Yan'anj sisi ga'mi nucuj únj rian a ni é re' nuguan' sa' sisi ganacaj Yan'anj ni ngüi aj.

³Ni nun gachej ruhua anin' únj nga nuguan' ga'mi únj rian án re' mánj. Ni nitaj si hua quij niman únj mánj. Ni nitaj si huin ruhua únj digya' yun'unj únj a ni é re' mánj. ⁴Sani garan' ruhua Yan'anj nga si gui'yaj únj. Ni garasun Yan'anj únj sisi ga'mi únj si-nuguan' Yan'anj huin nuguan' sa' rian ni ngüi. Ni hué daj a'mi gue únj. Ni sé si a'mi únj sisi garan' ruhua ni ngüi nga

nuguan' a'mi únj mánj. Sani a'mi únj nuguan' huin ruhua Yan'anj ga'mi únj rian ni ngüi. Ni acaj Yan'anj cuenta daj hua niman únj. ⁵Ni ni'i a ni é re' sisi nitaj aman digya' yun'unj únj man'an án re' daj rún' 'yaj 'ngo tsínj daj. A'mi sa' sij xi'í re', sani nini huin niman sij. Ni nitaj si nano' únj ango ducuanj sisi riqui a ni é re' san'anj gui'yaj gana únj mánj. Ni Yan'anj ni'i sisi sé daj 'yaj únj mánj. ⁶Ni nun nano' anin' únj sisi ga'mi sa' ni ngüi xi'í únj mánj. Ni nitaj si nano' únj si ga'mi sa' a ni é re' xi'í únj mánj. Sani hua si-chrej únj si gachinj únj si chracuij a ni é re' únj xi'í si huin únj tsínj apóstol rian Cristo.

⁷Sani ngaa guimán únj scanij a ni é re', ni gui'yaj únj daj rún' 'yaj 'ngo yun'unj xana ngaa dugumi 'ueé unj da'nij unj. ⁸Ni nin' ruhua gahuin 'i ruhua anin' únj ni'yaj únj ni é re'. Xi'í daj ni sé urin si-nuguan' Yan'anj ga'mi únj rian a ni é re', ruhua únj, sani ga'uej ruhua únj gui'yaj sun únj rian a ni é re' nej. Daj si nin' ruhua gahuin 'i ruhua únj ni'yaj únj a ni é re' aj. ⁹Ni ni'i a ni é re' daj gui'yaj sun únj ngaa guimán únj scanij ni é re' sisi daj gui'yaj únj guiri' únj si xa únj. Nugüi nigan' gui'yaj sun únj. Daj si nitaj si huin ruhua únj garasun únj rian án re' ngaa ga'mi únj si-nuguan' Yan'anj rian án re' mánj.

¹⁰Ni ni'i a ni é re', ni hué daj ni'i Yan'anj sisi gui'yaj sa' únj ngaa guimán únj scanij ni é re' huin ni é re' ni tsínj xuman ruhua ni'yaj Yan'anj. Ni dagahuin nica únj. Ni nitaj 'ngo si gui'yaj únj sisi ga'mi gaquin' ni ngüi xi'í únj mánj. ¹¹Ni

ni'i a ni é re' sisi daj rún' 'yaj 'ngo tsínj ngaa a'mi sa' sij sisi gahuin niá' ruhua da'níj sij, ni hué daj gui'yaj únj nga go'ngo a ni é re'. Ni riqui únj chrej rian án re' nej. ¹²Ni ga'nin' anin' únj sun rian a ni é re' sisi gache nica a ni é re' si-chrej Yan'anj daj rún' 'yaj ni tsínj nico' sa' Yan'anj. Ni aquínj Yan'anj sisi gane a ni é re' rian hua 'ueé nicaj sun Yan'anj.

¹³Xi'í daj ni niganj a'ui' únj si guruhua Yan'anj. Daj si ngaa gunun a ni é re' si-nuguan' Yan'anj ga'mi únj rian án re', ni nahuin ra'a yya a ni é re' nuguan' daj sisi hué si-nuguan' Yan'anj huin yya. Ni nun gataj a ni é re' sisi si-nuguan' ni tsínj huin mánj. Ni si-nuguan' Yan'anj huin xanga' yya. Ni 'yaj sa' nuguan' daj chruhua niman ni é re' huin ni é re' ni tsínj xuman ruhua ni'yaj Yan'anj. ¹⁴Ni ngaa guiran' ni é re' huin jnánj né' sayun, gui'yaj ni tsínj man xánj ni é re', ni uyan guiran' ni é re' nga ni tsínj nico' Yan'anj man estado Judea huin ni sij ni tsínj nicaj dugüi' nga Cristo Jesús. Daj si guiran' ni sij sayun, gui'yaj ni tsínj israelita huin ni sí' tsínj xánj ni sij. ¹⁵Ni hué ni tsínj israelita daj dagahui' Señor Jesús. Ni dagahui' ni sij ni tsínj ga'mi si-nuguan' Yan'anj asij ná. Ni guiri ni sij ne' chrej xe' ni únj nej. Ni nun aran' ruhua Yan'anj si 'yaj ni sij. Ni unun' ni sij nga daran' ni ngüi. ¹⁶Ni ngaa huin ruhua únj ga'mi únj rian ni ngüi 'na' anéj chrej sisi nacaj Yan'anj ni sí', ni na'uej ruhua ni sij sisi hué daj ga'mi únj mánj. Xi'í daj ni huaj da'ui ni sij gaquin'. Ni xi'í daj ducu ga'man ruhua Yan'anj ni'yaj ni sij.

Ausencia de Pablo de la iglesia

¹⁷Ni nunj si nitaj si nicaj dugüi' né' xi'í si gahuin nini únj doj rian án re', sani niganj nicaj dugüi' niman né' huin ín re' jnánj né' nga xica'uij né'. Ni nin' ruhua hua ruhua únj guchi' ni'yaj únj rian man án re' aj. ¹⁸Ni da ga'i gahuin ruhua anin' únj guchi' ni'yaj únj rian man a ni é re'. Ni nico' huaj hué daj gahuin ruhua man'anj, huinj Pablo. Sani guiránj sichre Satanás chrej rian únj guchi' ni'yaj únj rian man án re'. ¹⁹Ni ana'uij únj sisi ngaa ga'na' Señor Jesucristo, ni gui'yaj sa' sij nga únj xi'í a ni é re'. Ni gahuin niá' ruhua únj, gui'yaj á re' nej. Ni digyán án re' sisi gui'yaj sa' únj si-sun Yan'anj scanij a ni é re' aj. ²⁰Xanga' ni gui'yaj á re' sisi hua sa' si-sun únj rian Yan'anj. Ni huin niá' ruhua únj, gui'yaj á re' nej.

3 Ngaa ni ngaa nun gunucuaaj únj guchi' únj rian man án re', ni gani ruhua únj sisi guna huij gue únj xuman' Atenas. ²Ni ga'níj únj jnánj né' Timoteo sisi guchi' sij rian man án re'. Daj si huin sij 'ngo tsínj 'yaj sun nuguan'an nga únj rian Yan'anj. Ni a'mi únj nuguan' sa' xi'í Cristo rian ni ngüi. Ni ga'níj únj guchi' sij rian man án re' sisi ga nica ruhua ni é re', gui'yaj sij. Ni gui'yaj fuerza sij sisi guxuman sa' ruhua ni é re' ni'yaj á re' Yan'anj. ³Ni gui'yaj sij sisi si gahuin ruhua ni é re' xi'í sayun ran' a ni é re', ruhua únj. Ni ni'i a ni é re' sisi hua nian guiran' né' sayun daj. ⁴Ni ngaa guimán únj scanij ni é re', ni gataj chrún únj gunun a ni é re' sisi guiran' né' sayun daj. Ni daj

rún' ni'i ni é re', ni hué daj gahuin.
 5 Ngaa ni nun gunucuā ga mánj. Xi'í daj ni ga'ni 'ngo tsínj daj rian man án re' sisi nāchin' snan'anj sij daj xuman ruhua ni é re' ni'yaj ni é re' Yan'anj. Daj si guxu'uij sisi duna ni é re' si-chrej Yan'anj xi'í si digya' yun'unj sichre ni é re'. Ngaa ni guere'ej si-sun únj gui'yaj sun únj scanij ni é re', gui'yaj sichre.

6 Saní ngaa nanicaj Timoteo gan'anj sij xánj án re', ni nicaj sij nuguan' sa' nasíj sij sisi xuman sa' ruhua ni é re' ni'yaj á re' Yan'anj, ataj sij. Ni 'i ruhua ni é re' ni'yaj ni é re' ni dugüi' ni é re', ataj sij nej. Ni nata' sij sisi niganj nanun sa' ruhua ni é re' ni'yaj ni é re' únj. Ni 'i ruhua ni é re' ni'yaj ni é re' únj, ataj sij nej. Ni daj rún' huin ruhua únj guchi' ni'yaj únj rian man ni é re', ni hué daj huin ruhua ni é re' ga'na' ni'yaj ni é re' rian man únj, ataj sij gunun únj. 7 Hué dan ni scanij ni sayun ran' únj, ni gahuin niá' ruhua únj gunun únj sisi xuman ruhua ni é re' ni'yaj ni é re' Yan'anj huin ín re' jnánj né' nga xica'uij né'. 8 Xi'í si hua nica ruhua ni é re' nga si-chrej Señor, ni huin niá' ruhua únj gache únj si-chrej Yan'anj, 'yaj ni é re'. 9 Ni nin' ruhua huin ruhua anin' únj ga'ui' únj si guruhua Yan'anj, 'yaj á re'. Ni nin' ruhua huin niá' ruhua únj rian Yan'anj xi'í a ni é re' aj. 10 Nugüi nigan' achínj jni'yaj únj rian Yan'anj sisi riqui Yan'anj, ni guchi' ni'yaj únj rian man án re'. Daj si huin ruhua únj digyán únj rian án re' nuguan' gui'yaj sisi guxuman sa' ruhua ni é re' ni'yaj ni é re' Yan'anj anj.

11 Ni huin ruhua únj sisi chracuij Yan'anj huin chrej né' nga Señor

Jesús sisi ga'ue guchi' ni'yaj únj rian man án re'. 12 Ni huin ruhua únj sisi gahuin 'i ruhua á re' guini'yaj a ni é re' go'ngo ni dugüi' a ni é re', gui'yaj Señor. Ni daj rún' 'i ruhua únj ni'yaj únj a ni é re', ni hué daj ga 'i ruhua á re' guini'yaj a ni é re' daran' ni ngüi, ruhua únj. 13 Ni huin ruhua únj sisi gahuin nica ruhua á re', gui'yaj Señor. Ni gahuin sa' niman ni é re' rian Yan'anj. Ni si da'ui a ni é re' gaquin' rian Yan'anj huin chrej né' ngaa ga'na' Señor Jesús nga daran' ni ngüi sa' nicaj dugüi' nga sij, ruhua únj.

La vida que agrada a Dios

4 Hué dan ni xi'í si nicaj dugüi' a ni é re' nga Señor Jesús, ni achínj jni'yaj únj rian a ni é re' sisi ga gue dagahuin a ni é re' si digyán únj rian a ni é re' huin ín re' jnánj né' nga xica'uij né'. Daj si gataj únj gunun a ni é re' daj gui'yaj á re' chruhua xungüi nan. Ngaa ni ga'ue gui'yaj a ni é re' si garan' ruhua Yan'anj. 2 Daj si hua ni'i ni é re' daj hua nuguan' ga'nin' únj sun rian án re' xi'í Señor Jesús. 3 Ni huin ruhua Yan'anj sisi gahuin sa' niman án re' rian Yan'anj. Ni na'uej ruhua Yan'anj sisi gui'yaj squira' go'ngo a ni é re' ni ngüi mánj. 4 Ni huin ruhua Yan'anj sisi gane 'ueé go'ngo ni é re' nga nica a ni é re'. Ni guinun yan'anj án re' nica á re' nej. 5 Ni si gani quij ruhua a ni é re' xi'í ni yun'unj xana daj rún' 'yaj ni ngüi nun ni'i Yan'anj mánj. 6 Ni ga cuidado rian ni é re' sisi si digya' yun'unj a ni é re' jnánj ni é re' xi'í ni yun'unj xana. Daj si Señor huin si gui'yaj nico castigo daran' ni tsínj

'yaj daj. Nĭ hué daj hua gataj chrun únj rian ni é re'. ⁷Daj si nun gaquinj Yan'anj né' sisi gache né' 'ngo chrej quij hua. Sani huin ruhua Yan'anj sisi gahuin sa' niman né' rian Yan'anj. ⁸Ngaa nĭ tsínj na'uej ruhua dagahuin nuguan' digyán únj nan, nĭ nun dagahuin sij rian man'an Yan'anj. Daj si sé si-nuguan' ni tsínj huin nuguan' digyán únj. Nĭ Yan'anj huin si riqui Espiritu Santo rian né'.

⁹Nĭ sé si ní'yanj sisi garun únj nuguan' guchij rian man án re' sisi gahuin 'i ruhua ni é re' ni'yaj ni é re' ni dugüi' ni é re'. Daj si hua digyán Yan'anj rian án re' sisi gahuin 'i ruhua go'ngo ni é re' nga ni dugüi' ni é re' aj. ¹⁰Nĭ hué daj 'yaj ni é re' nga daran' ni tsínj nico' Yan'anj man estado Macedonia. Sani achínj jni'yaj únj rian án re' sisi gahuin ruhua á re' doj ni'yaj á re' ni dugüi' né' huin ín re' jnánj né' nga xica'uij né'. ¹¹Nĭ gui'yaj fuerza á re' sisi guiman din'inj ni é re'. Nĭ si nahuij ruhua á re' nga si-sun dugüi' re' mánj. Nĭ gui'yaj sun ni é re' nga ra'a ni é re' daj rún' ga'nin' únj sun rian ni é re' aj. ¹²Ngaa nĭ ga'mi achij 'ueé a ni é re' rian ni tsínj nun xuman ruhua ni'yaj Yan'anj. Nĭ si gachin 'ngo rasun rian ni é re' mánj.

La venida del Señor

¹³Nĭ huin ruhua anin' únj si guini'i ni é re' daj guiran' ni tsínj gahui' huin ni tsínj nico' Jesús huin ín re' jnánj né' nga xica'uij né'. Ngaa nĭ si nani ruhua á re' daj rún' 'yaj ango ni ngüi mánj. Daj si nani ruhua ni sij xi'f si si ganánjij ni dugüi' ni sij, ruhua ni sij. ¹⁴Nĭ xuman ruhua né' sisi gahui' Jesús.

Nĭ ganánjij sij scanij ni niman, gui'yaj Yan'anj. Nĭ xi'f daj ni'i né' sisi Yan'anj gui'yaj gana'nij ni ngüi guinicaj dugüi' nga Cristo ngaa gahui' ni sij. Nĭ ga'na' nuguan'an ni sij nga Jesús, gui'yaj Yan'anj.

¹⁵Hué dan nĭ né' tsínj guiman da güi ga'na' Señor chruhua xungüi, ni si gahuin rian né' rian ni ngüi hua gahui' mánj. Nĭ hué daj ataj únj gunun a ni é re', gui'yaj Señor. ¹⁶Daj si gaguáj man'an Señor ngaa gahui sij xata' nanij sij rian xungüi nan. Nĭ nicaj sun si-nane Señor gunun ni ngüi. Nĭ gunun ni ngüi si-nane 'ngo ángel huin achij nin'. Nĭ gunun ni sij si ga'yanj si-trompeta Yan'anj anj. Ngaa nĭ ni ngüi guinicaj dugüi' nga Cristo huin ni tsínj gahui', ni hua sini ni sij gana'nij aj. ¹⁷Nĭ né' guna guiman, ni nicaj Yan'anj né' gan'anj nuguan'an né' nga ni ngüi ganánjij daj rian nga. Nĭ nari' dugüi' daran' né' nga Señor xata'. Nĭ gane niganj né' nga Señor. ¹⁸Hué dan nĭ nari' nucuaj niman go'ngo a ni é re', gui'yaj ni nuguan' nan, ruhuāj aj.

5 Sé si hua nian garun anin' únj nuguan' guchij rian án re' xi'f güi ga'na' ruhua' yún Cristo huin ín re' jnánj né' nga xica'uij né'. ²Daj si ni'i sa' ni é re' sisi daj rún' nun ni'i né' un güi gatu tsínj tĭ gui'yaj tĭ sí' ne' yan', nĭ hué daj nun ni'i né' un güi ga'na' Señor mánj. ³Nĭ 'ngo güi nĭ gataj ni ngüi: "Hua din'inj mán daran' né'. Nĭ hua xitinj mán né'." Daj gataj ni sij. Ngaa nĭ hué gue hora daj, nĭ nasinunj ga'na' 'ngo sayun rian ni sij. Nĭ daj rún' ran' 'ngo yun'unj xana ngaa ruhua ga'nga da'nij unj, nĭ hué daj guiran' ni ngüi daj. Nĭ si ganani ni sij mánj.

⁴Sani axa' á re', ni nitaj chrej huaj si guxu'ui' a ni é re' daj rún' xu'ui' ni tsínj ni'í si gatu tsínj tu huin ín re' jnánj né' nga xica'uij né'. Daj si nitaj si man ni é re' rian hua rumi' mánj. ⁵Daran' ni é re' man guní'yanj. Ni man ni é re' rian xiguin yan'an. Daj si xiguin chruhua niman né', gui'yaj Yan'anj. Nitaj si man né' rian hua rumi' mánj. ⁶Hué dan ni si gator né' daj rún' 'yaj ango ni ngüi mánj. Sani gunun sa' ruhua né' gana'uij né' güi ga'na' Señor. Ni si guixini né' mánj. ⁷Ni tsínj atoj, ni atoj ni sij ne' ni. Ni ni tsínj hua xini, ni hua xini ni sij ne' ni huin ni sij ni tsínj nun xuman ruhua ni'yaj Yan'anj. ⁸Sani né' man rian xiguin sa', ni hua nian si niganj ga cuidado né' nga si gui'yaj né'. Ni daj rún' dugumi 'ngo snado niman sij nun sij 'ngo gató gaga', ni hué daj dugumi né' man'an né' xi'í si xuman sa' ruhua né' ni'yaj né' Yan'anj. Ni gahuin 'i ruhua né' ni'yaj né' ni dugüi' né'. Ni daj rún' dugumi 'ngo snado man'an sij ngaa nun chra sij 'ngo jnahui go'o, ni hué daj dugumi né' man'an né' xi'í si gahuin yya ruhua né' sisi naca'j Yan'anj né'.

⁹Daj si nun gani ruhua Yan'anj sisi gahuin né' castigo mánj. Sani gani ruhua Yan'anj naca né' xi'í Señor Jesucristo aj. ¹⁰Ni gahui' Jesucristo xi'í né'. Ni xi'í daj, asi man né', asi gahui' né', ni guiman nuguan'an né' nga sij. ¹¹Xi'í daj ni daj rún' 'yaj á re', ni ga gue gui'yaj fuerza á re' sisi nari' nucuaj niman ni dugüi' ni é re'. Ni ga nica ruhua go'ngo ni é re' nga si-nuguan' Yan'anj, gui'yaj á re' nej.

Pablo exhorta a los hermanos

¹²Achínj jni'yaj anin' únj rian ni é re' sisi ga ní'yanj a ni é re' nga ni tsínj 'yaj sun scanij ni é re' huin ín re' jnánj né' nga xica'uij né'. Daj si a'nin' ni sij rian ni é re', gui'yaj Señor. Ni riqui ni sij ducúanj sa' rian án re' nej. ¹³Ni nin' ruhua ga ní'yanj a ni é re' nga ni sij. Ni nin' ruhua ga 'i ruhua á re' ni'yaj á re' ni sij xi'í sun 'yaj sun ni sij scanij ni é re'. Ni gahuin din'inj ruhua ni dugüi' ni é re' aj. ¹⁴Ni achínj jni'yaj anin' únj rian án re' sisi ga'ui' a ni é re' chrej sisi gui'yaj sun ni tsínj rumi rián re' huin ín re' jnánj né' nga xica'uij né'. Ni ga'mi 'ueé ni é re' rian ni tsínj hua ninaj nga si-chrej Yan'anj sisi nari' nucuaj niman ni sij, gui'yaj á re'. Ni chracuij ni é re' ni tsínj achin si guxuman sa' ruhua ni'yaj Yan'anj. Ni ga'mi naj ni é re' rian daran' ni ngüi aj. ¹⁵Ga cuidado ni é re' man'an án re' sisi si gui'yaj quij go'ngo ni é re' rian ni tsínj gui'yaj quij nga ni é re'. Sani niganj gui'yaj sa' á re' nga ni dugüi' a ni é re'. Ni gui'yaj sa' ni é re' rian daran' ni ngüi aj.

¹⁶Niganj gahuin nia' ruhua ni é re' aj. ¹⁷Ni si ga'nin' ruhua á re' gachinj jni'yaj á re' rian Yan'anj mánj. ¹⁸Ni 'ngo naga'ui' a ni é re' si guruhua Yan'anj nga daran' si ran' án re'. Daj si hué daj huin ruhua Yan'anj sisi gui'yaj a ni é re' xi'í si nico' a ni é re' Cristo Jesús.

¹⁹Ni si guiránj ni é re' chrej rian Espíritu Santo sisi si ga'mi Espíritu Santo nuguan' sa' scanij ni é re' mánj. ²⁰Ni si gani ruhua á re' sisi nitaj si ní'yanj nuguan' ga'mi 'ngo

tsínj daj, gui'yaj Espíritu Santo mánj. ²¹Xacaj a ni é re' cuenta daj hua go'ngo nuguan' gunun a ni é re'. Ngaa ni guna a ni é re' nga nuguan' sa'. ²²Gahuin nini a ni é re' rian daran' si quij hua. ²³Ni Yan'anj gui'yaj si huin din'inj ruhua né'. Ni huin ruhua anin' únj sisi gahuin sa' nin' ni é re', gui'yaj man'an Yan'anj. Ni huin ruhua únj sisi dugumi sa' Yan'anj niman án re' nga nnee cúj a ni é re' nej. Ngaa ni si guida'ui ni é re' a 'ngo gaquin' ngaa ga'na' Señor Jesucristo chruhua xungüi aj. ²⁴Ni sica' Yan'anj. Ni aquínj Yan'anj án re' sisi guñicaj dugüi' a ni é re' nga

Yan'anj. Ni gahuin yya daran' si gataj Yan'anj gunun a ni é re'.

Saluciones y bendición final

²⁵Gachinj jni'yaj a ni é re' rian Yan'anj xi'í únj huin ín re' jnánj né' nga xica'uuj né'.

²⁶Ni ngaa nari' dugüi' a ni é re', ni garun du'ua ni é re' ni dugüi' a ni é re' rian Yan'anj. ²⁷Ni a'nij sun rian án re' nga si-xugüi Señor sisi gaya 'ngo ni é re' yanj carta nan rian daran' a ni é re' huin ín re' tsínj nico' Yan'anj. ²⁸Ni huin ruhua anin' únj sisi gui'yaj Señor Jesucristo sinduj rian daran' ni é re' aj. Amén.